

詩

益

詩益卷之十

金壇後學利

國朝詩學

小雅上

或問二雅無康夷間詩何也

小大雅詩前終於成王後起于厲王其康王以下夷

王以上皆無詩

曰失其傳也曰文武成王之世遠矣今其詩皆

存焉康王以下失其傳何也曰雅有二有盛有衰其盛

焉者周天子之守也樂官之所掌而裁也是故其傳也

遠及其衰也則不然故曰失其傳也夫周自康昭以降

其失德非一世矣上有失德則下有怨譏夫刺譏之作

衰世之意也。而布之廟朝。列之樂官。子孫世世守之。以彰其祖宗之失。而弗替。周德雖衰。寧有是乎。是故康夷之間。非無詩也。然以其衰世之作。多刺譏之意。非朝廷郊廟之所用。非天子之所守。與樂官之所掌。而私傳於人。則久而易亡。是以失其傳也。曰。然則騶幽之詩。曷爲錄之。獨詳。曰。周之亡也。亡于騶幽。故其詩之傳于人也著。及孔子之世。而又未甚遠也。故猶得而論次之。若夷王以上。則失其傳焉。故弗錄之也。曰。然則小雅鹿鳴以下雅歌之詩。皆作于周之盛乎。曰。不然。雅歌者。亦有盛

有衰

雅歌盛衰說詳詩辨

然其詩皆祭祀燕饗之所作朝廷郊廟

之所用而非刺譏當代之詩是以皆傳焉雅無康夷閒

詩者謂其無刺譏當代之詩非謂其無雅歌詩也

雅有大小何也曰小雅所以繼大雅也曰何謂繼大雅

曰小雅起鹿鳴終孤葉三十七篇所謂雅歌也雅歌者

正樂之常歌也其詩不與美刺時事之詩同例焉起六

月終何草不黃四十三篇宣王幽王時詩也而大雅終

于江漢常武宣王之詩小雅六月采芑繼之所謂繼大

雅也

以上詳見後詩表

大雅復終以瞻卬召旻幽王詩者所以

詩大問

終大雅也。雅亾于幽王故也。曰何以謂之小大也。曰大雅著文武成王以上周室盛代之詩。而小雅惟列宣幽則其世衰矣。春秋傳稱季札觀樂歌小雅曰周之衰其明驗也。世有先後亦有盛衰。故雅有大小。小大者盛衰先後之義也。曰其次則又先小雅後大雅何也。曰猶風之先雅然。

小雅首鹿鳴至菁菁者莪二十二篇何也。曰所謂雅歌也。曰何謂雅歌。曰天子朝會燕饗之樂常歌之。故曰雅歌。其義則余辨之矣。說見後詩辨其列于小雅首何也。曰孔

子之志也。孔子論大雅詩至于宣幽之間而廢周室之衰王道之缺也。故采當世所用朝會燕饗樂歌諸詩。自鹿鳴以下二十二篇。繼大雅終篇之義而編次之。

說見後大

雅。著古先王治天下之法。以寓復興周室之意。別列爲

小雅以別大雅。孔子之志也。曰。其首鹿鳴四牡皇皇者。華三篇何也。曰。鹿鳴詩曰。我有嘉賓。德音孔昭。視民不怵。君子是則是效。如此則賢人輔政于內矣。四牡。皇皇者華。又賢臣所以任勞于外也。內外得其理而國治矣。王道之本也。曰。鹿鳴以下諸詩何時作乎。曰。蓋作于成

王周公之後。然多聞不可考。言其義而略其說可耳。
常棣伐木次之何也。曰常棣親親也。伐木厚朋友故舊
也。親親而厚故舊。王道之大者。故次之。先鹿鳴四牡皇
皇者華。後常棣先賢賢而後親親。禮有加也。先常棣後
伐木。先親親而後朋友。故舊恩有推也。

天保次之何也。曰鹿鳴四牡皇皇者華。常棣伐木。上所
以厚其下也。天保下所以報其上也。易曰。上下交而其
志同。泰道也。

采芣出車。杜次之何也。曰傳曰。天保以上治內。文以

治內也。又曰：采薇以下治外。武以治外也。魚麗小序斯見下文。

言善矣。孔子之志也。曰：天保以上其詩，蓋爲燕饗樂歌作者。若采薇、出車、杕杜三篇，則皆戍卒所作，而采薇、出車又爲周宣王時事。與六月、采芣相類，今列於雅歌，何也？曰：蓋後世遣戍勞役之樂歌，或用之，而無害于義，故孔子采之云耳。何以知其然？曰：以其與天保以上魚麗以下諸詩相比而知之。

魚麗南陔、白華、華黍次之，何也？曰：魚麗傳曰：天保以上以治內，采薇以下以治外。始于憂勤，終于逸樂，故美萬

物盛多能備禮焉斯言善矣孔子之志也夫王道備而
禮樂興魚麗言其備禮也繼以笙詩南陔白華華黍言
其備樂也

南有嘉魚南山有臺次之何也曰禮樂盛而燕饗行天

子與境內羣臣樂之所謂始憂勤終逸樂者如此

南山有臺

篇美君子曰邦家之基邦家之光以邦家始言蓋天子
燕其卿大夫之詩說見詩本傳南有嘉魚在南山有臺
蓋同

由與崇邱由儀三笙詩又次之何也曰禮益治而樂益
修也

蓼蕭湛露形弓次之何也曰燕饗之行也天子與天下
諸侯共樂之此王道之成也先南有嘉魚南山有臺後
蓼蕭湛露形弓先內睦而後外寧也先蓼蕭湛露後形
弓先文德而後武功也蓼蕭湛露並美諸侯之德故曰
文德形弓燕有功諸侯故曰武
功

菁菁者莪次之何也曰菁菁者莪美既見君子樂賢也
王道之興也莫大於用賢始鹿鳴終菁菁者莪反覆之
義也王道備矣

次以六月采芑何也曰菁菁者莪以上著王道也孔子

之志也。六月采芑以下。繼大雅江漢常武之後。著宣王
中興之功。所謂繼大雅也。江漢常武南征也。六月繼以
北伐。先遠而後近也。采芑言威蠻荆。復及南征者。其詩
曰。征伐蠻荆。蠻荆來威。蓋其事與六月相比焉。故次之。
車攻吉日次之何也。曰。車攻吉日。所以復古也。蓋六月
采芑之功。于是乎成。而文武成康之業。其興矣乎。
鴻鴈次之何也。曰。鴻鴈者。所以撥亂世反之治。六月采
芑。車攻吉日之本也。故次之。

庭燎沔水鶴鳴次之何也。曰。撥亂世反之治者。有其德

也。庭燎則其君憂勤于上，河水鶴鳴其臣交儆于下，所謂德也。

次以祈父何也？曰：鶴鳴以上，宣王之盛也；祈父而下，其衰矣乎？是以其業不終焉。

白駒次之何也？曰：祈父之應也。宣王之政終衰矣。白駒之賢所以去也。曰：雅亦有應乎？曰：雅之衰也自厲宣，是故著其應焉，屈之義也。

黃鳥我行其野次之何也？曰：亦祈父之應也。其鴻鴈之反乎。

斯干無羊次之何也。曰刺宣王也。宣王之末有白駒之賢不能用。及黃鳥我行其野而民散于下。乃屑屑宮室牧人之事而不知恤。故一傳而有滅亾之禍焉。宣王之罪也。曰然則詩人之志亦有刺乎。曰詩人之辭蓋有美無刺焉。所謂詩人孔子之志不同者此之謂也。

小雅下

幽王詩首節南山正月十月之交何也。曰幽王之亂也。三詩盡之矣。凡雅著幽王詩數十篇。然言幽王之亂未有詳於此者。故以居首。曰三詩又以節南山爲首何也。

曰罪尹氏也。尹氏周之大師也。所謂秉國之均者。首節南山。所以著首惡也。

爾無正次之何也。曰蓋犬戎攻周西京將亾而作此詩。著幽王之亂而亾其國。故次之。

小旻次之何也。曰國之亂也有其本焉。無善謀焉。故也。故次之以小旻。

小宛次之何也。曰國之亂也。邪謀肆于上。而賢人懼罪于下。如小宛詩人有溫恭之德。而戰戰兢兢若此。小旻曰淪胥以敗。此之謂也。

小弁次之何也。曰：宜曰之廢也。幽王之所以亂其國也。故次之以小弁。

巧言何人。斯巷伯次之何也。曰：亂之成也。興于讒。不獨宜曰以讒廢。而在廷諸臣咸被其辱焉。故次之以巧言。何人。斯巷伯。先巧言者。巧言刺君子信讒。刺王也。何人。斯巷伯。所以刺同列也。故次巧言之後。何人。斯作於蘇公。諸臣之貴者。巷伯。諸臣之賤者。先何人。斯後巷伯。先其貴而後其賤也。

何人斯。蘇公刺暴公。巷伯詩。離惟刺讒人。故並云刺同列。

次以谷風。蓼莪何也。曰：巷伯以上亂於上也。谷風。蓼莪。

則及下矣。風之義也。兮風。巧言何人。斯巷伯之應也。蓼莪。小弁之應也。

大東。四月次之何也。曰。蓼莪以上。亂於國也。大東。四月。則及天下矣。大東。東國被困也。四月。南國之人告哀也。北山。無將。大車。小明。次之何也。曰。周大夫之傷行役。懷怨思者。遍天下焉。故次之以北山。無將。大車。小明。著幽王之亂政及天下云爾。

鼓鐘。次之何也。曰。刺幽王也。周之天下大亂矣。而幽王莫之恤。且行樂不息焉。國欲不亡得乎。

楚茨至車牽十篇之義何也。曰所謂雅歌也。天子將祀朝會燕饗之樂常歌之。義猶鹿鳴以下然。其次鼓鐘之後何也。曰鼓鐘卒章曰鼓鐘欽欽。鼓瑟鼓琴笙磬同音以雅以南。以簫不僭。孔子誦詩及此而有感焉。故次之以楚茨十篇。卽所謂雅也。夫幽王之世雖甚無道。然其所歌以爲祭祀朝會燕饗者未嘗不陳古義而道盛德。不改周室之舊也。故次之以雅歌之詩。繼前鹿鳴以下二十二篇之義。明先王之澤未亾。且以望周道之復興焉。曰然則其以楚茨信南山甫田大田四篇居首何也。

曰周之王也。后稷以農事興。今讀楚茨信南山甫田大田四篇。其猶見后稷之遺乎。王道之本也。其先楚茨信南山後甫田大田何也。曰楚茨信南山祭宗廟也。甫田大田祭方社田祖也。先楚茨信南山後甫田大田。先祖廟而後外神也。曰然則楚茨信南山甫田大田皆美祀事之詩也。非爲燕饗樂歌作者。今列于雅歌何也。曰蓋後世祭祀燕飲之樂歌。或用之而孔子采之云耳。義猶前采薇以下然。

瞻彼洛矣。萋萋者華。桑扈鴛鴦。大之何也。曰美王道之

成也。王道立于上，而諸侯睦于下。故次之以瞻洛裝華。桑扈鴛鴦。瞻洛鴛鴦，下所以頌其上也。裝華桑扈，上所
以美其下也。上下交之道也。

類升車牽次之何也？曰：瞻洛裝華桑扈鴛鴦，所以治外
也。類升車牽，所以治內也。王道之成也，治外必本于治
內。且夫幽王之亂，起于家庭，而拯亂反治之道，亦必自
正家始。故楚茨十篇終之以類升車牽。

次以青蠅何也？曰：車牽以上著王道也。孔子之志也。繼
前節南山以下至巷伯十篇之義，復著幽王之亂，故次

之以青蠅、青蠅，所以刺讒也。幽王之亂也，興于讒，故節南山以下，終以巧言何人斯巷伯。而此復繼以青蠅，刺用讒也。

次以賓之初筵何也？曰：繼前谷風以下至小明七篇之義，復著幽王之亂及於天下，故次之以賓之初筵。夫太東四月，北山無將大車，小明興刺於周與列國之大夫而賓之初筵，乃畿外大國諸侯所作。武公又諸侯之賢者，蓋幽王之亂政日聞天下，而國將亡矣。

魚藻采芣之義何也？曰：所謂雅歌也。猶楚茨以下然其

次賓之初筵之後何也曰世之盛也上下相頌美降及
衰世而諸侯興刺焉其賓之初筵之反乎故次之曰小
雅列天子諸侯朝會燕饗之詩屢矣其義何也曰幽王
之亾國也在失諸侯之心故卒有驪山之敗而莫之救
孔子於天子諸侯朝會燕饗樂歌之詩反覆焉傷亂之
志也

次以角弓何也曰繼前青蠅賓之初筵之義復著幽王
之亂夫幽王之世雖諸侯其救以亾其國然使兄弟宗
族未盡叛離必有起而赴國難者何至驪山一敗卒坐

視而不爲之所哉。孔子傷之，故次之以角弓。角弓，刺幽王不恤族也。曰：然則角弓不與青蠅賓之初筵同次，而次魚藻采芣之後何也？曰：孔子編詩及小雅之末，而其義微矣。蓋其詩有二焉：其一著幽王之亂，義取乎正也；其一採當世所用祭祀朝會燕饗樂歌諸詩，開次之以明拯亂反治之道，則所以爲寓也。故自節南山至鼓鐘十八篇，青蠅賓之初筵二篇，角弓至采芣四篇，白華綠芣二篇，漸漸之石至何草不黃三篇，皆所謂正也。楚茨至車牽十篇，魚藻采芣二篇，黍苗陽采二篇，狐裘一篇。

皆所謂寓也。至其詩之次，則以相反之義爲比。魚藻采芣，賓之初筵之反也。黍苗芄柳之反也。隰桑杻葉，蟋蟀之反也。其他或復因前篇詩人之意而及之。若楚茨以下十篇之次，鼓鐘黍苗之次，都人士采芣，其立義不同焉。若其所謂正者，則又以前後相繼爲義。故青蠅賓之初筵二篇，繼前節南山以下十八篇之義。角弓至采芣四篇，繼前青蠅賓之初筵之義。白華蟋蟀二篇，又繼前角弓以下四篇之義，而終于漸漸之石以下三篇焉。小雅之義盡矣。曰：然則小雅之詩，不以其類爲次，而必間

次之如此何也曰孔子傷周室之亾也故於其詩反覆之而不覺其篇之屢焉義之重焉不然幽王時詩宜與楚茨以下樂歌諸詩不同編矣今乃樊然雜亂若此何哉

曰然則苑柳次角弓之義何也曰宗族怨于內諸侯叛于外幽王之所以卒亂而亾其國也此角弓苑柳二篇相繼之義也

都人士采綠次之何也曰都人士采綠傷亂之詩也故次角弓苑柳之後然都人士有懷盛世之意焉采綠婦

人怨曠而不失其正。先王之澤也。

黍苗周宣王時役人作也。其事與大雅崧高相比。焉。今不次大雅而次小雅何也。曰。所謂雅歌也。曰。其詩既役人作矣。復以爲雅歌何也。曰。蓋後世勞役之樂歌。或用之。而孔子采之。其義與前采薇以下三篇同。曰。何以知其然。曰。以其次小雅之末。且與下陂桑一篇同次。故知之。然則其次都人士采綠之後。曰。因前篇之義何也。曰。孔子讀都人士采綠。而傷周室之亾也。然猶見先王之澤焉。夫盛世諸侯斬脰。不獨天子之德。亦賴方伯之功。

故次之以黍苗。黍苗美召伯能勤勞諸侯也。所以反苑

柳之義。

召伯爲申伯營謝。故曰勤勞諸侯。惟召伯能勤勞諸侯。是以宣王之世。諸侯輯睦。天下宗周。故

曰反苑。

而繼前魚藻采芣之意。且六召犬戎之兵以亂

周室者。申侯也。其先申伯以元舅之親。受宣王之封。今

申侯因幽后一朝之忿。而外通夷狄。覆滅宗周。罪莫大

焉。夫子次此詩于苑柳都人士采芣之後。曰華之前。以

著申侯之罪。春秋之義也。曰申伯與申侯不同爵矣。何

以知其爲申侯之先耶。曰申。一國也。稱伯復稱侯者。蓋

申本侯爵。而申伯在宣王時。嘗爲方伯云。

陽桑之義何也。曰。亦所謂雅歌也。其次黍苗之役何也。
曰。陽桑。燕饗君子之詩也。繼黍苗之義。明中興復古之
道。在用賢而已。故次之以陽桑。猶小雅首次鹿鳴及菁
菁者莪意也。

次以白華何也。曰。繼前都人士采芣之義。復著幽王之
亂。夫褒姒寵而中后廢。以啓申侯之暴逆。周室於是焉
亾。夫子前次黍苗以寓其意。而繼以此篇。所以著幽王
亾國之本。而小雅之義將終矣。

絲蠻次之何也。曰。陽桑之反也。余前言之矣。幽王之亾。

國也。尹氏皇父諸人藉寵于上，而賢人微賤勞苦困厄于下。是以亂生內外而莫之救。夫其拯亂反治之道，在復熙柔之義而已。故以熙柔歸蠻貊葉三篇開次之。終小雅之義焉。曰：然則瓠葉之義何也？曰：亦所謂雅歌也。義猶熙柔然。

小雅終于漸漸之石。若之華。何草不黃三篇何也？曰：漸漸之石。若之華。何草不黃。亡國之詩也。故居小雅之末。焉所以傷周之亡也。周亡而雅亡矣。

大雅上

大雅首文王篇何也。曰。周之王也。德莫盛于文王。故大雅以文王篇爲首。

大明次之何也。曰。文王之德。王季作之。武王述之也。故次以大明。

緜次之何也。曰。文王之德。又上本于大王者也。故次以緜。

棫樸旱麓思齊次之何也。曰。美文王之德也。文王之作人也。棫樸旱麓思齊見之矣。緜之卒章言文王得人之盛其詳矣乎。故次之。

皇矣次之何也曰次皇矣之義猶大明繼然下不及武王合下武也。

靈臺次之何也曰文王之德業盛矣余讀皇矣末三章及靈臺篇見之皇矣末言伐密伐崇美武功也靈臺言作靈臺辟廱美制作也。

下武次之何也曰美武王繼文王也。

文王有聲次之何也曰美文王作豐武王作鎬咸美文武之業也故以繼皇矣靈臺下武之義。

生民次之何也曰周之王也基始于后稷故配天稱祖

焉。由文武而上推之，故次以生民。

行葦既醉，鳧鷖假樂之義何也？曰：所謂雅歌也。天子祭祀燕飲之樂，常歌之，然則其次生民之後何也？曰：生民卒章曰：『后稷肇祀，庶無罪悔，以迄于今。』孔子編詩及此，而懷周室祀典之美焉。後編次須詩意亦寓于此故次以祭祀燕飲樂歌之詩。所以著周道之盛也。而小雅閒次諸雅歌詩之義，其始于此矣。

次以公劉何也？曰：周之王也，基始于后稷，其次則莫盛于公劉。故次之以公劉，所以繼生民也。曰：周莫尊于后

稷公劉今其詩次于後何也曰孔子之次大雅也其義以文王爲本而上推之則德盛于文王故也故其詩以文王篇爲首而大明緜皇矣次之生民公劉又次之洞酌卷阿次之何也曰美成王也成王紹文武臻大平之治而制作興焉故公劉以上其詩多作于成王之世而列聖之德于焉不衰夫子以洞酌卷阿緜之所以美成王也。

大雅下

厲王詩首民勞板何也曰民勞板之辭隱矣故以居首

何謂隱曰民勞板刺同列也其刺王之志隱焉

蕩次之何也曰蕩所以刺王也故次之

抑桑柔次之何也曰抑桑柔之作也其在厲王喪亂之後乎抑之詩曰肆皇天弗尙如彼泉流無綸胥以亾又曰天方艱難曰喪厥國桑柔詩曰亂生不夷靡國不泯又曰天降喪亂滅我立王又曰哀惻中國具贅卒荒作此詩者其在厲王流彘之後乎故次民勞板蕩

次以雲漢何也曰宣王之興也雲漢始之矣雲漢宣王之能有其始也小雅祈父而下宣王之亾其終也小雅

繼大雅之義也。

崧高烝民韓奕次之何也。曰宣王之興也有其臣故也。
崧高烝民韓奕見之矣。

江漢常武次之何也。曰著宣王之功也。蓋大雅之詩於
是終小雅六月以下繼之。所謂繼大雅也。曰然則復終
以瞻卬召旻幽王之詩何也。曰所以終大雅也。雅亾于
幽王故也。大雅雅之正也。小雅孔子之所以寓其志云
爾。義見前故其于大雅也必有以終之。所以存雅之正
也。曰終大雅何取乎瞻卬召旻也。曰以其詩之爲義也。

簡而賅故取之且召旻卒章曰昔先王受命有如召公
日辟國百里卒也日蹙國百里於乎哀哉維今之人不
尙有舊懷盛治也抑思周召之功也故夫子采之以終
大雅小雅首鹿鳴以下二十二篇繼之所以寓其志也
而國風之始于周南召南亦以繼雅也夫。

周頌

頌先周後魯何也曰周天子也魯諸侯也尊天子而卑
諸侯故先周後魯也終以殷頌何也曰殷頌前代之詩
也故次于周之後焉書先唐虞夏商而後周者敘歷統

也。詩先周後殷者。尊時王也。然則魯諸侯也。其詩先于殷何也。曰。魯周之諸侯。故其詩先于殷焉。亦所以尊周也。

周頌始祭文王。詩何也。曰。頌之始文王也。義偕雅然。其以清廟維天之命居首。而維清次之何也。曰。清廟維天之命。皆美文王之德者也。維清詩曰。維清緝熙。文王之典。夫有文王之德。而後有文王之典故。清廟維天之命居首。而維清次之。孔子之編周頌也。多以其制作之意爲次。皆所謂典也。維清一篇始之矣。

烈文次之何也曰諸侯朝助祭于廟祀典也故次以烈文繼維清也何謂祀典曰以其祭祀之禮常行之故曰

祀典凡周頌三十一篇而其所載祭祀之禮十有七

祀典

詩凡十七篇臣蓋於此見古先王制作之精意為孔子

工禮唐二篇附

繼維清之義而采其義類以為次所以別風雅也曰然

則周禮莫大于明堂郊祀如以其義之大小為辨則其

詩宜先我將思文二篇若諸侯助祭亦三代之常耳

考

頌請篇可見非典之大者今其詩居首何也曰著周有天下

之始也諸侯之助祭于周也周有天下故也周有天下

而後禮制興焉。祀典行焉。故大雅文王篇美天命于周
亦以殷士祿將爲言。蓋其典雖若小子明堂郊祀。而其
義莫重焉。故夫子列其詩于首。而又冠以清廟維天之
命維清三篇。明周之有天下。皆本於文王之德。而其祀
典之行也。雖多制作於成王周公之世。而必歸美文王
焉。此周公當日作頌之志。而亦孔子編次頌詩之意夫
曰其復次以祭大王詩。天作一篇何也。曰周之有天下
也。唯大王實始之。魯頌曰實維大王實始翦商。繼清廟
維天之命維清之義而復推本之。故次以天作。曰然則

大雅並美大王王季之德屢矣。今頌不次祭王季之詩何也。曰。蓋古以其篇而孔子闕之。

祭成王詩昊天有成命一篇又次之何也。曰。美成王也。祀典之行也。其莫盛于成王周公之世乎。故次以昊天有成命。美成王也。

我將次之何也。曰。明堂宗祭祀典也。故次以我將。我將祀典之大者。前旣言之矣。次以我將。繼烈文也。

時邁次之何也。曰。巡守柴望亦祀典也。故次以時邁。我將也。夫明堂宗祀。巡狩祭告。禮雖有二。然明堂所以

受諸侯之來朝而巡狩則往朝諸侯又方嶽之下皆有明堂齊之有明堂其明驗也故我將時邁其詩亦以類而次所謂以制作之意爲次者此類是也先明堂宗祀後巡守柴望者先其內而後其外也

曰其復次以祭成王康王詩執競一篇何也曰成康周之盛王也故咸有頌焉次以執競繼昊天有成命也然則其詩不與昊天有成命同次何也曰孔子之於詩也多以其相關者爲義焉風雅頌之歸一也曰前此不次祭武王之詩何也曰周頌始于文而終于武故前此不

次祭武王之詩。首清廟維天之命維清始文王也終酌
桓齊般終武王也。

思文次之何也曰郊配后稷祀典也故次以思文思文
亦祀典之大者前既言之矣次以思文繼我將時邁也
先我將後思文者先親親而後尊尊也其時邁一篇則
因我將類次之故竝列于前云爾。

臣工噫嘻之義何也曰戒農官也戒農官非祀典也其
次于頌何也曰古者大事行于廟周之戒農官也其在
廟祭後歟亦猶祀典也故次之其次思文之後何也曰

思文美后稷之德曰。粒我烝民。莫匪爾極。然則成康之世。臣工噫嘻。成王康王時戒農官之詩。詳後詩辨。其守后稷之業弗替矣乎。故次以臣工噫嘻。繼思文也。

振鷺次之何也。曰。二王之後。咸來助祭。祀典也。臣工噫嘻。王道之本也。周之所以代夏商也。故次以振鷺。繼臣工噫嘻也。

豐年次之何也。曰。豐年祭告祖廟。祀典也。故次以豐年。繼振鷺也。

有瞽。階次之何也。曰。始作樂合于祖。季冬薦魚。季春薦

觴皆祀典也。故次以有瞽潛亦繼振鷺也。傳曰周監于二代。郁郁乎文哉。周之代夏商有天下也。于是禮樂咸備焉。豐年。饋備禮也。有瞽備樂也。

雖載見次之何也。曰。雖武王率諸侯助祭于文王廟之詩。載見。成王率諸侯助祭于武王廟之詩。皆祀典也。故次以雖載見。繼豐年有瞽潛也。夫周禮樂之盛如此者。皆文武之德而諸侯康之故能有天下而守其典不失也。雖載見亦所以著周有天下之義也。其與烈文一也。抑頌詩於是將終矣。乃及成王祭武王廟之詩焉。

下則于少

子訪
落同頌終于武王故也

有客次之何也。曰義猶振驚然亦祀典也。故次以有客繼繼載見也。有客美微子也。周既代商有天下。雖以微子之賢而僅存其祀。周道之盛也。蓋于是及成王繼封殷後之事矣。故其詩又次振驚之後。

武次之何也。曰奏大武祀典也。故次以武。繼有客也。蓋及于成王之世而武王之功成矣。雖有武庚之暴而弗能亂。雖有管蔡之逆而弗能危。周道其盛矣乎。

復次以閔予小子訪落敬之。小毖成王初卽位朝廟之

詩何也。曰。美成王繼武王之功也。於其初卽位見之矣。
美其始也。其先閔予小子。而訪落敬之。小毖又次之。何
也。曰。閔予小子。成王初免喪朝廟之詩也。故列四篇之
首。訪落敬之。既朝廟而訪于羣臣。故次之。小毖曰。予其
愆而誌後患。其作于三監既叛之後乎。故又次之。

載芟良耜次之何也。曰。年穀既登。祭告于祖。祀典也。故
次以載芟良耜。繼武也。

絲衣次之何也。曰。祭之明日。釋而賓尸。亦祀典也。故次
以絲衣。亦繼武也。夫成王之世之盛也。歲和而民豐。禮

物咸備祀典稱隆焉載芡良耜絲衣見之矣其繼武王
之功者由是矣乎故下酌桓賚般四篇卽所謂武也然
其詩不與武同次而閒以閔予小子以下及此諸篇所
以美成王繼武王之功也抑亦明其詩之作于成王周
公之世云爾。

周頌終酌桓賚般何也曰所謂武也美武王之功也周
德莫盛于文王功莫大于武王故頌以文王始之武王
終之也武王而下錄其頌者惟成王康王若昭王以降
則創之德不足故也孔子之志也。

魯頌

頌無夏有殷魯何也曰頌之無夏也失其傳也其有殷魯也孔子錄之也曰孔子之錄殷頌也所以存前代之典也若魯頌則魯人之私耳孔子錄之何也曰孔子魯人也錄之所以從魯人之私也曰周自昭王以降且不錄其頌矣魯則從其私何也曰周天子宜有頌者也若夫魯則諸侯也不宜有頌者也宜有頌而錄其頌則無德而疑于德也故削之不宜有頌而錄其頌則雖德不稱而猶錄之亦所以著其失也孔子之志也曰然則其

以明有駉二篇若首何也曰美魯僖君臣也有駉美其
臣。泮水閟宮次之何也曰魯僖之賢也于是修先制如
泮宮新昭功業如平淮上承列祖之德而弗替則泮閟
祖廟。夷之屬。備矣是故其詩終焉若其言之近誣有不俟辨而明者
所謂著其失也。

商頌

商頌首那烈祖何也曰商始于成湯故也那烈祖祀
成湯之詩也其終于殷武何也曰殷武祀武丁也商再
興于武丁焉故終殷武也立鳥長發次其閒何也曰立

鳥長發言商之世德焉商之世德盛故前有成湯而後
有武丁也是故立鳥祀武丁孫子之詩也而先殷武王
美世德故也。

詩益卷之十終

詩益卷之十一

金壇後學劉始興

字子彥一字鄒江

補撰

詩次補言

國風

或疑詩有齊魯毛韓四家其詩次先後恐有不同然考四家於詩惟異其義耳先儒未嘗言其詩次有異也惟曹氏詩說謂齊詩召南先采蘋後草蟲故儀禮歌召南越草蟲取采蘋三百篇惟此小異餘無所見近世傳魯申公詩說子貢詩傳二書詩次絕與今不同蓋近代人

所僞托不足據也。三家詩前人多言其書已亡。惟韓氏外傳僅存。今不宜復有申公詩說。馬氏端臨文獻考亦不載此二書。又先儒每言三家皆以關雎爲刺康王詩。而朱子亦以刺康后爲魯詩說。今申公詩說乃以關雎爲美后妃。義與毛氏同。則其非申公本書而爲近代人所僞托明矣。西河毛氏云。子貢詩傳。魯申公詩說。向來無此書。至明嘉靖間。盧陵中丞郭相奎家忽出此二書。以爲得之黃文裕公。必關石本。按從來說詩不及子貢。古今藝文志目亦從無子貢詩傳。徒以論語有賜也可與言詩一語。遂造爲此書。其識趣弁鄙。卽此可見。至申公說詩傳云。申公以詩經爲訓故。無傳文。附志又云。傳詩亡於西晉。則雖有傳文亦已亡之久矣。今之詩說非舊之詩。故可知。

先儒解周南召南詩惟未辨別本篇詩意與孔子編次之義則所謂美文王之化者竟若此二十五篇作者意內皆有此情理矣抑匪獨此也卽如言文王之化自家而國自近而遠竟若當時作者已如此推說矣今就本篇讀之關雎葛覃卷耳見文王后妃之德矣然未及於教化國也桃夭兔置采芣見其本國之化矣然未及於南國也故分觀之各得其一節而合考之乃得其全體以此推之聖人編詩之意與本篇詩人之意洵有不同者葛覃卷耳二篇雖后妃所自作孔子次此詩於關雎之

後乃所以明后妃之德葛覃歸寧言其常卷耳不見君子而思言其變先葛覃後卷耳先其常而後其變也

國風風俗美惡多以婦人女子之詩見之故周南次桃夭芣苢二篇桃夭美及時嫁娶化之始也芣苢婦人室家和樂化之成也此二篇先後之義宛豈一篇次其間又明國之賢才衆多乃風俗之所由美也

江漢風俗變淫爲貞化之始也汝旁婦人閱其君子而咏歌父母懼澤之入人者深化之成也故先漢廣而汝墳次之

右周南

鵲巢美南國諸侯夫人始嫁之事。次以采蘋。又所以美夫人之德也。

草蟲南國大夫妻不見君子而思。次以采蘋。亦所以美大夫妻之德也。

或謂齊詩先采蘋後草蟲。今以其義推之。說亦可通。蓋采蘋奉祭祀。言其常。草蟲不見君子而思。言其變。先采蘋。後草蟲。亦與周南葛覃卷耳同義。

鵲巢以下四篇。先南國諸侯夫人詩。後南國大夫妻詩。

羔羊至野有死麕六篇。先南國大夫及大夫妻詩。後南國諸侯夫人詩。反覆之義也。

小星之妾。夙夜在公。抱衾與裯。言其常也。若江有汜。既棗後悔。雖遇變而卒歸於正。其被文王后妃之化益深。此二篇以詩意之淺深而次也。

何彼穠矣。美王姬下嫁。亦猶關雎鵲巢之類。故或附於此。所謂以其類附也。蓋當時附者若此類。或不一篇。而夫子刪之耳。

周南桃夭。芣苢。文王國中之化。其女子不言貞潔而貞。

深可知若漢廣行露野有死麕諸詩皆淫風初變之驗
蓋南國新被文王之化如此其與文王國中民異矣
此見化有淺深之義。

右召南

衛風三十九篇無分屬邶鄘之說此在左氏春秋傳明
證有二襄二十九年季札觀樂歌邶鄘衛傳稱衛風而
不稱邶風鄘風一也襄三十一年北宮文子引首相舟
篇威儀棣棣不可選也二語傳稱衛詩而不稱邶詩二
也。按地理志並引邶詩鄘
詩。蓋衛風誤屬邶鄘起自漢儒。說併詳後詩辨。

衛風聖人特起之例三冠以邶鄘一也其詩分而爲三
二也衛諸侯之風不與鄭齊以下諸國同列而先於王
三也夫冠衛以邶鄘非以邶鄘名衛也亦非以其詩爲
邶鄘詩也蓋夫子雖取邶鄘二國名冠衛之上而其詩
仍繫於衛若邶鄘亡國無詩者然又分其詩爲三亦
寓邶鄘并入於衛之意二者皆衛詩也三國皆衛國也
左氏襲取孔子刪定之書附會季札觀樂之事而不辨
其義既以其詩爲衛風矣復曰歌邶鄘衛則是以邶鄘
名衛矣左氏說詩後詩經及左氏引詩集後世學者因冠邶鄘衛三國

名於前遂以其詩分屬三國則是以衛詩爲邶鄘詩矣

說詳後今讀左氏而悟邶鄘衛合一之旨。詳後詩辨復參訂

詩義而知左氏附會之失雖屬創論實至理也此聖人

特起之例一矣國風篇惟衛詩獨多以其編簡繁重故

不得不分。見後然亦有微義詩衛至宣惠之閒國將滅

亾人道混絕夫子欲有以正之故至二子乘舟而其詩

遂分及文公中興衛以復國文公而降衛風已終故至

定之方中載馳而其詩又分此聖人特起之例二矣。此條

詳見前若夫二南盛而西周興西周興而殷室亾於是

乎有邶鄘衛。追周公伐三監。作洛邑。而東周之基業兆焉。於是乎有王。此二南衛王相繼之義。又聖人特起之例三矣。故祇就衛詩以論。僅衰世諸侯之風。宜降次王國之後。然夫子既冠以邶鄘。而追其始封。則其事在商周革命之會。其地爲亾殷故墟之餘。又周轍之東。實基於周公作洛之日。故以衛王相比。不獨傷殷之亾。而亦重有感於周室播遷之故矣。夫子之意深哉。此條與前詩次同及後詩辨有互發明者。讀者宜參觀之。

聖人編次二南明文王之化。所以爲萬世法也。邶鄘衛

以下衰世之詩亦必著其上下感應之理治亂興亡之故又所以垂戒也。一法一戒而聖人立教之旨備矣。然聖人憫衰世之意尤婉而曲故其編次衛風又與二南不同。如共姜武公詩不列於前而列於後莊姜詩柏舟綠衣碩人等篇或冠於首或繫於末及次衛女泉水許穆夫人載馳諸詩各有微義學者熟復詳玩焉庶幾得聖人扶衰拯亂之苦心矣。

凡國風以考其詩之應爲主。二南應之正也。邶鄘衛以下應之變也。應有正變卽風有正變也。

日月終風二篇之意比柏舟緣衣不同

說見後而終風篇

意尤激切故日月居前而終風次之。

雄雉篇諷隱之旨尚微婉故在匏有苦葉之前。

周南汝墳作於文王之世故末章以父母孔邇慰其夫。

雄雉作於衛國衰亂之時故末章諷其夫以歸隱之義。

二者皆婦人之詩而其言之不同如此可以悟盛衰感應之理。

式微篇意激而直旄邱則稍婉矣先之式微所以著其意也。

新臺二子乘舟二篇以其事之先後而次也。

蝮螭刺淫乃先草其惡之甚者相鼠刺無禮則又進矣。干旄好賢則又進矣。此三篇以其事之淺深而次也。

衛風下卷詩次義頗難解初讀之似雜亂無倫序者久玩乃得其旨蓋重取武公莊公之詩而列之以著其應所以明反覆之義耳。

淇澳之應考槃竹竿河廣伯兮四篇考槃一篇其正應也。上有淇澳之賢君下有考槃之賢士故曰正應。竹竿以下皆婦人之詩故並次考槃之後。

衛風雖衰。尙有考槃之賢士。此武公之遺澤也。然終於
隱遯而不見用。則其時之失政可知。故其詩在淇澳碩
人之閒。

竹竿。河廣。衛女所作。伯兮。國中婦人所作。此三篇以其
人之尊卑而次也。竹竿言其常。河廣言其變。故竹竿復
列河廣之前。

碩人之廳。氓。芄蘭。有狐。木瓜。四篇。氓。有狐。木瓜。皆淫詩
也。氓既淫而悔。故居有狐。木瓜之前。所以爲戒也。

木瓜篇。未露男女之辭。詩意似比有狐稍微婉。然其言

曰。匪報也。求以爲好也。則其淫亂之志益固而俗終不可變矣。故次有狐居衛風之末。

衛風自氓竹竿以下。雖各著其意。然其詩有反對之義。氓有狐木瓜竹竿河廣伯兮之反也。芄蘭一篇次其間。乃復推廣之以明其俗之益壞耳。

衛俗之淫有變而益深者。以其國之亂政日益故也。故凱風谷風其始變也。及靜女而又甚焉。及桑中而又甚焉。惟衛風下卷著重複之義。又自爲淺深。不與前二卷同例。然氓旣淫見棄。亦所以警其惡於後。末有狐木瓜

二篇著衛俗之終衰皆比前義爲深。

衛風詩如鴉之奔奔篇先儒龜山楊氏說定之方中以

下四篇安成劉氏說皆深得聖人編次之意。

鴉之奔奔篇楊氏說

云詩載此篇見衛爲狄滅之因故在定之方中之前因以是說考於歷代凡淫亂之主未有不至敗國亡家者然後知聖人垂戒之義近世有獻議乞建廷不以國風進篇者失其旨矣定之方中以下四篇安成劉氏說云衛俗淫亂無禮不好善道以致亡國君臣上下盡當惕於三者之中而不知矣道滅亡之餘懲往事而興善念於是淫亂者有螟蛉之刺無禮者有相鼠之惡樂善道者又有干旄之好賢下士非文公之化何以臻此但偶舉一二未嘗推廣後之學者因疑於聖經正旨故鮮用心於此使聖人垂訓大義不明於天下惜哉。

其他篇有此類

不悉著。

右邨鄔衛

中谷有蕓，婦人傷此離之詩也。葛藟則國中男子亦去其鄉里，家族而失所矣。此二詩先後之義。

采葛邱中有麻，皆不見其人而思之之詩。然采葛但言其不見之久而邱中有麻，多望其繼來之辭。故邱中有麻，又次采葛之後。

衛風桑中有瓜木瓜，新臺將茨碩人之應也。王風采葛邱中有麻，亦揚水失政之應也。新臺將茨桑中應之從

其類者也。揚水采葛。邱中有麻。應之非從其類者也。蓋揚水失政於上。而其國人離散於下。國人離散於下。而其俗之淫風作焉。故一變而爲中谷有蓷。葛藟再變而爲采葛。邱中有麻。風俗之壞有淺深。故其詩之大有先後。近代學者未辨明此義。遂有謂東周之俗非鄭衛比。不宜亦有淫詩。如錢氏公允之論。亦卽之甚矣。夫文王時南國非鄭衛俗也。奈何其先且有淫風耶。

右王

鄭爲東周新國。厥後齊晉秦楚諸霸國皆爭伐鄭。鄭服

晉則晉霸。服楚則楚霸。聖人以鄭次諸大國前。亦有感慨之意歟。

聖人編次國風先後。大體多依世次爲序。故其始終盛衰之義。上下成應之理。皆可推論而曉。其間或有一二變例。如二南之次。衰周詩。衛風之次。共姜武公詩。亦不以世次爲先後。然必有義理存焉。若鄭風既列文公詩。清人一篇於前。而有女同車以下。復如舊解作刺昭公。忽則世次不明。世次昭公在文公前且亾義不可曉矣。餘說詳詩傳國風王衛齊陳皆有淫詩。而鄭風尤多。今以其詩合考。

之莖其變有不同者。如王俗本未嘗淫也。及揚水失政之應。再變而有采葛邱中有麻。然其風止此矣。衛俗雖淫。其初猶未甚也。及柏舟綠衣。新臺牆茨之繼應。始變而有凱風谷風。繼變而有靜女桑中有狐木瓜。然其風亦止此矣。齊詩之淫者。惟一篇。又不與他國同風。陳風好遊蕩而近於淫。宛邱三東門。所以居首也。及益以墓門株林之應。再變而有防有鵲巢。月出澤陂。然其風亦止此矣。若夫鄭本淫俗也。惟上有緇衣之化。而其風稍變。故將仲子作焉。及莊公文公以後。國數有亂。教化寢

衰而其下之淫風遂日變而未有已矣故有女同車猶
緩也及扶蘇擇兮佼童褰裳而又變及丰東門之墀則
又變及子衿揚之水則又變及野有蔓草溱洧則又變
蓋其風愈變而愈深其俗亦愈變而愈壞夫子備錄其
詩而弗削又因其淺深之義分別之以明鄭俗之屢變
益淫與他國有不同者他日論爲邦而獨欲放其聲猶
此志也

鄭衛淫風之變不同故其詩之次亦異如衛凱風谷風
靜女桑中諸詩皆圓次於柏舟綠衣新臺鶉之奔奔所

以明其俗之愈淫由上之亂政日益故也若鄭風自有
女同車以下至末凡淫詩十一篇皆類次於兩叔于田
清人篇後而自分淺深之義又所以明鄭俗本淫而國
有亂政遂積久日滋其風自變而不可止此聖人編次
鄭衛分別之微義也

鄭風兩叔于田之意有詳略故先略而後詳

國無賢者則其俗益壞故有女同車以下諸淫詩次違
大路之後

有女同車篇尚未露淫語故曰其辭緩

山有扶蘇篇曰不見子都乃見狂且似男女相見而喜故反言以諱之之辭蔣兮篇曰倡予和女復正道二人親厚之意兩篇之義若相承然其竝次有女同車後者淫志已露故也

狡童篇曰彼狡童兮不與我言兮維子之故使我不能餐兮褰裳曰子惠思我褰裳涉溱子不我思豈無他人乃其男女之情始合終乖若怨若謔之辭故此二篇又繼扶蘇蔣兮之後謔而且怨淫而且蕩故曰其言又肆狡童曰維子之故則謔且怨者惟此人耳褰裳曰豈無

他人則其情愈蕩而其言愈肆故復次校量之後

丰東門之墀皆其人既去而思之之辭然丰始志不相從猶愈於東門故先丰而東門之墀次之

風雨反東門之墀以上諸篇之義子衿又反風雨一篇之義故三篇之次如此

東門之墀思其人惟曰室邇人遠子不我卽而已子衿曰縱我不往子寧不嗣音又曰子寧不來又曰一日不見如三月兮故曰其言也迫

揚之水亦男女相對之辭然其要約之意始終不渝故

以終子衿以上諸詩之義

出其東門與上子衿揚之水有反對之義又與女曰鷦
鳴風雨有正對之義蓋彼則見其婦人之賢此則見其
男子之賢

蔓草曰邂逅相遇適我願兮夫邂逅相遇而期其淫則
非所淫之時亦淫矣溱洧謠於遊觀之所則非所淫之
地亦淫矣故二篇居鄘風之末

蔓草曰適我願兮又曰與子偕臧蓋惟二人相對之辭
如此溱洧謠於遊觀之所而士女殷盈則一國之人皆

然矣。故又次蔓草之後。

古鄭

詩有先陳其上之化。而後及其下者。衛風首柏舟。綠衣。邶風首緇衣。叔于田。是也。亦有先著其下之俗。而後及其上者。齊風首還著。東方之日。是也。

齊風冠鷄鳴篇。與下還著東方之日。不相應。其編次義。與他國風不同。

鷄鳴亦古先王齊家之化之一端也。與下東方未明南山有反對之義。故曰正齊風之始。

齊俗好勇尚鬪習于田獵大國之風也故夫子編次齊風以還爲首而著東方之日次之。

東方未明南山二篇以詩意所刺之淺深而次也。

俗有變而益深者鄭衛諸風是也若齊風甫田盧令二篇與前還著東方之日雖不同次然未有淺深之義惟以東方未明南山二篇次其間見其化之所從來耳。

冠婚皆禮之大者然婚禮之廢其害甚于冠故著居前而甫田次之首還終盧令所以明大國之風始終不變也。

敝笱以下。齊風末附見魯事。夫子用意獨深。學者不可不致思也。

敝笱載驅二篇同意而載驅之言爲尤詳。故次敝笱詩。先其詳而後其略者。所以先著明其事也。至先略後詳。則分詩意之淺深而次之。二者例雖不同。而其義則一。右齊。

西周舊國。齊晉爲大。而齊先疆。晉次之。晉霸後齊故也。魏小國。亡於晉。故其詩又次齊唐之間。

魏風首葛屨汾沮洳。終以碩鼠。一刺儉嗇褊急。一刺貪殘。此魏國失政之大略也。

葛屨首章言其儉嗇褊急之實。汾沮洳篇惟曰彼其之子美無度而已。故葛屨居首而汾沮洳次之。

園有桃篇亦刺魏人失政。然有憂歎之辭而語無明指。故又次葛屨汾沮洳之後。

園有桃曰。彼人是哉。子曰何其。曰彼人者。蓋亦刺在位之辭。非刺其君語也。

十畝之間曰十畝之間兮。桑者閑閑兮。行與子還兮。曰行曰還。蓋將隱遯而尚未決之辭。伐檀美賢者不得位而自食其力。則其志決矣。此二篇淺深先後之義。

或疑葛屨汾沮洳刺儉。碩鼠刺貪。其詩似不相應。然從來在位執政之人。禍急者多刻儉。害者必貪。故魏風以葛屨汾沮洳爲首。而碩鼠終之。

右雅

十三國風名義。如周南召南。蓋周公采詩時所定。小雅曰以雅以南。則二南之名出來舊矣。鄭齊魏秦陳檜曹。皆從其國號。無他義。東周詩不曰周而曰王。或疑詩者本有此號。而孔子因之。或孔子時所更定。二者說皆可通。惟邶鄘并入於衛。唐改國號曰晉。其傳已久。乃衛既

冠以邶鄘晉則仍其故號此必非常日錄詩之舊乃聖人特起之例而與他國風不同其義今猶可推而曉也蟋蟀山有樛二篇冠唐風首一以著晉國之亂一以著唐俗之厚其義不可偏廢也蟋蟀篇居首山有樛次之乃以其詩意之淺深爲先後者

揚水國人將叛晉歸曲沃而懷聊歎桓叔之子孫碩大且遠將有晉國二篇之義若相承然故其次如此

聖人深美唐俗有古帝之遺民故編次其詩以蟋蟀山有樛二篇始之復以有杕之杜葛生采芣三篇終之

有林之杜葛生采芣三篇。大唐風末。惟以見唐俗之厚。
而刺晉不用賢及卒亂於讒意亦寓焉。然其說不可泥
也。

聖人於鄭風著其淫。唐風著其厚。一美一惡。而其義昭
然可鑒。故曰詩可以觀。又鄭國亂於上。而其俗之壞。遂
至於屢變而愈深。若晉曲沃之亂。比鄭爲甚。然其俗卒
不變者。豈非古帝之遺化入人心者深且遠哉。

右唐

鄭小國也。然先齊唐諸大國。以其東周之新國也。故次

王以著其義周衰而後有鄭也秦亦東周新國然穆公制霸在齊桓晉文之後則秦之疆後於齊晉又康公以降自擯戎狄不與中國盟會故其詩遂居齊唐之次。

車鄰駟騏二篇之意相似然秦始有朝廷之禮其事比田獵園囿爲重故車鄰居首而駟騏次之。

渭陽作於黃鳥之前今其詩獨次於後蓋其義有三。上屬無衣著秦晉兵連之意一也。明秦之初睦於晉二也。秦之形勢弱於外三也。大抵衰世之風亦自其本國而及其與國其猶衛式微旄邱之義歟。

無衣見秦俗好戰。關夫子特降次渭陽一篇於其後。故曰著秦晉兵連之意。

齊魏唐秦四國衰政之應。與鄭衛王不同。齊俗夸詐。輕變先王之法。其習武事好田獵者。大國之風也。蓋其由來舊矣。今雖著其應。甫出盧令爲東方未明南山之應而非自今始也。

魏儉嗇福急於上。而民不聊其生。則國隨以亡。唐雖有大亂。而其俗之美者卒不變。秦人剽悍。故其民忍於相棄。而習戰鬪。後世漸於衰俗之化。而遂無復先王之遺民。此其大略也。然齊國淫詩惟一篇。魏唐秦皆不入於

淫則與鄭衛王異矣。然則民俗貞淫。雖由政化使然。抑其風土亦有辨歟。

唐俗不亾古帝之道。秦俗已改西京之舊。此非政化有淺深。亦風土使然耳。

右秦

陳檜曹皆亾國也。然陳虞帝之後。其國比檜曹稍大。故列於前。

陳風宛邱。東門之枌。先著其下之俗。與齊風同。蓋自大姒以降。其俗亦由來舊矣。故其詩之次如此。

陳俗遊蕩無度而宛邱東門之枌二篇國人猶知作詩以刺之與衛風蝦蟆相鼠略同義此人心所爲近古也夫子首冠其詩亦所以正之也

宛邱刺其男子東門之枌刺其婦人又東門之枌之末比於淫褻宛邱而益蕩故宛邱皆首而東門之枌次之東門之池東門之楊二篇之意有淺深故先東門之池而東門之楊次之下防有鵲巢月出同

陳國淫風亦有變而益深之義與鄭衛略相類東門之池東門之楊皆男女媾合之辭耳若東門之楊則有負

約不至。而其人思之矣。然猶未甚也。及墓門之應變而
有防。有鵲巢。月出一則憂。開於讒言。一則不見而悲情。
思之甚而近於哀矣。又其甚者。株林之應。再變而有澤
陂。則其志愈哀。是以陳風終焉。

陳風東門之楊。與鄭丰相似。防有鵲巢。與鄭楊之水相
似。然鄭俗之淫變而愈肆。陳俗之淫變而愈哀。故防有
鵲巢。惟云心焉切切。心焉惕惕耳。月出則曰。勞心悄兮。
勞心慄兮。勞心慄兮。澤陂則又曰。傷如之何。寤寐無爲。
涕泗滂沱。天國俗之淫。衰政之應也。淫而至於哀。則其

國將亡矣。此陳鄭淫風不同之義。

右陳

陽有萋楚匪風二篇。亦皆萋裴之應。

檜曹亡國居變風之末。又匪風下泉二篇居檜曹之末。有變極思正亂極思治之意。故終之以幽而繼以雅。

右檜

檜國先亡。曹次之。故曹居檜之後。

檜曹首萋裴蜉蝣二篇。末匪風下泉二篇。詩意皆相類。故並次變風之末。

曹風候人鳴鳩二篇相次有相因之義亦有反對之義
孔子讀候人傷曹之不能用賢故次以鳴鳩此相因義
也曹君雖遠君子而近小人然在位者猶有淑人君子
之德如此先王之遺澤也此反對義也

右曹

幽風詩文中子及華陽范氏說

程元問於文中子曰敢問幽風何風也曰變風

也元曰周公之際亦有變風乎曰君臣相誦其能正乎
成王終變周公則風遂變矣非周公至誠其孰卒正之
哉元曰居變風之末何也曰夷王以下變風不復正矣
夫子蓋傷之也故終之以幽言變之可正也惟周公能
之故休之以正變而克正危而克扶始終不失其本其
惟周公乎休之幽遠矣哉華陽范氏曰幽風居於風雅

之問何也風之所為終雅之所為始也變風終於曹風
明王賢伯之不可得於是夫之以幽反之於周公而後
至於鹿鳴言周之所亦深得聖人編詩之意然惟此一
以盛者由周公也

端而未能推廣說已見前衛風

幽風名幽惟七月一篇鴟鴞以下六篇乃後人以其類

附之者此曰類者以其同為周公所作及國人美周公之詩

七月鴟鴞二篇周公竝作於居東時故鴟鴞附七月之
後

鴟鴞東山作於上者也其詩之次從順鴟鴞作於東山之前故先鴟鴞

後東破斧以下作於下者也其詩之次從逆破斧作於伐柯以下

三篇之後而次
在其先故曰逆

破斧一篇雖作於伐柯以下三篇之後然夫子欲明當
日周公東征時上下之情故進次之以繫東山之下

伐柯九罭二篇之意略同然九罭言東人願留公之意
爲詳故次伐柯之後

右幽

雅分小大未知所自始今以二雅編次之意考之非聖
人莫能定也蓋小雅所以繼大雅小大者以盛衰先後
之義而名說已見前問雅詩次第既編自聖人則小大

之名依之而起以此推之洵孔子編詩時分別之如此
歟

雅詩舊分什數

朱子集傳云雅頌無諸國別故以十篇爲一卷而謂之什亦未知所

自始或以爲孔子所定此說無可考愚按風分十三國

頌分殷魯皆孔子以前錄詩之舊而孔子因之若衛詩

分三卷雅分小大乃聖人特起之例然有微義存焉

說

見至于分什之說惟以篇數爲別則於義理無關也其

起于孔子或在孔子以後今皆未有定蓋古書用簡二

雅篇數既多即不得不分然聖人編詩未有無義而立

例者但以衛詩分卷之例推之可見雅詩分什與衛詩

分卷不同。衛詩分卷有義。雅詩分什無義。恐此已非聖人之舊。左氏春秋內外

傳引詩亦不見什名。今每什復各加什首。如云鹿鳴之什以冠十之類詳見下。

篇之前與國風分冠國名同例。此則深有害于詩次之

義蓋後儒所加而愈失聖經之舊矣。按事有相因疑雅詩分什在前然祇

分卷而止後人因之比照國風分國例遂增加什首分什無義增加什首則尤害義說詳下文故今竝

闕之。

二雅盛衰之義凡三變蓋自文王至河酌卷阿十八篇

為盛雅厲王詩民勞板以下則變而衰矣。宣王周室

中興之主其詩始盛終衰鶴鳴以上著其盛祈父以下

著其衰再變及幽王詩節南山正月以下則變而又衰而

周室將亡矣三變故雅之盛者至成王詩洞酌卷阿而已

終以上今分爲卷民勞板其始衰也自厲迄宣至于江漢常武

又由衰而反之盛周室于是中興焉故其詩至江漢常

武而又終大雅詩止此瞻印召此夫子分小大雅之義

是幽王詩二篇附

也宣王詩六月采芑至斯干無羊又自盛而迄於衰此

又雅詩之一終也以上今分爲卷節南山以下至末則變而又

衰由是雅降國風而其詩遂亡矣凡此所以明周道之

盛衰王政之得失聖人編次二雅之意本自全體洞達
無有隔礙。今後儒拘於分什之例每十篇以前各加什
首。小雅爲什者八。鹿鳴之什白華之什彤弓之什祈父
之什小旻之什北山之什桑扈之什
都人士大雅爲什者三。文王之什生民
之什蕩之什什首旣分前後
隔越不相通貫。小大雅編次之義遂淆亂而不可講矣。
又如厲王詩民勞板二篇與后稷公劉成王詩同什。幽
王詩節南山正月十月之交雨無正四篇與宣王詩同
什。而民勞板以前冠以生民爲什首。節南山正月以前
冠以祈父爲什首。其於盛衰之雅旣混合不分而綱領

又復失序

綱領謂什首也。周王詩以後復生民篇。孔氏

乃有什首爲長各統諸篇之說

孔氏莊云雅詩分什爲

長卷中之

篇皆統焉。洵悖謬無理之已甚者故不可以不闕也。

聖人編次雅詩之意本難解蓋其詩既分大小而小雅

又列大雅前其閒朝會祭祀燕饗樂歌諸篇又與宣幽

時詩相閒雜次如或不得其解義例益復難辨故讀二

雅者必當貫徹全詩

大雅三十一篇。小雅八十篇。

往復玩味積久融

洽乃可漸次以明今復亂以後儒增加什首之例使前

後數十餘篇之詩強分畛域以謬失其旨是以漢唐已

來學者於此等大義從闕不講或復以錯簡爲疑皆分什之說誤之耳。

易繫傳上下聖人釋經之例也。今雅詩分卷之例孔子之舊已不可考。故且從闕。惟附易繫之例分上下卷蓋以聖人釋經之例釋聖經庶幾變通之一法焉。

二雅雅歌詩專爲燕饗不及時事故從朱子闕時世說無害詩義也。今凡小雅所著雅歌詩首鹿鳴以下後楚茨以下諸篇共三十
七篇既皆闕其時世別爲一例則小雅

起於宣王詩終於幽王詩而小雅繼大雅之義明併二

雅分大小之名義亦明。

小雅雅歌詩。閒有時世可考者。

如常棣采芣出車之類。

大抵在厲

宣之世。

說詳詩辨。

可知此三十七篇亦不皆盛世之作。

小雅首鹿鳴至菁菁者莪二十二篇。聖人借雅歌詩以寓意。編次先後。閒見王政施行次第。古先王經世之大概。治道之規模。蓋今讀其詩而若或遇之。

鹿鳴以下二十二篇。繼大雅末召旻卒章之義。玩味之。乃見聖人寓意感慨深微處。

王道以得人爲本。有鹿鳴嘉賓之德。以輔弼於內。有四

牡皇皇者華。任事之臣以奔奏於外。則內外咸得其人矣。故曰王道之本。

鹿鳴燕羣臣。其任國家無事之日。歟。四牡皇皇者華。則有事而燕其使臣。故次之。然皇華以遣使臣。四牡以勞其來。以其事之序言之。當先遣後勞。今先勞後遣者。惟有以勞之。乃有以遣之。知其勤苦而後可以使之也。

鹿鳴以賢賢。常棣以親親。伐木以厚故舊。皆王道之本也。

天保頌美。非諛辭也。惟有德者足以當之。故其詩次鹿

鳴以下五篇之後

賢賢親親厚故舊皆所謂德也

天保以上文以治內采薇以下武以治外推廣小序詩
斯得聖人編次微旨所謂王政施行次第古先王治天
下之法如此。

采薇言伐獫狁出車兼言伐獫狁西戎故出車次采薇
之後采薇出車言辛卒在外之事杖杜言其室家父母
之情故杖杜又次采薇出車之後

魚麗備禮就本篇言之祇是備燕饗之禮然推廣之凡
禮皆然可知次以笙詩南陔白華華黍與魚麗備禮相

劉。卽見備樂意。然亦是借義如此。非本詩意也。

南陔。白華。華黍。匹闕無辭。故三篇次第之義不可考。由庚崇邱山儀同。

南有嘉魚。南山有臺。二篇詩意相類。故同次。然南山有臺篇。頌美賓客之意。比南有嘉魚篇。加詳焉。故復次其後。

南有嘉魚。南山有臺。次問說曰。天子與境內羣臣樂之。此是與後蓼蕭湛露彤弓燕外諸侯詩相對而得其義者。

小雅首鹿鳴本篇義兼燕諸侯之使然與下四牡皇皇者華燕使臣詩相對故取內輔爲義此南有嘉魚南山有臺本篇義亦可兼燕外國使臣然與下蓼蕭湛湛彤弓燕外諸侯詩相對故取境內爲義須知此等祇是借義蓋王道推行及成功次第由內達外自近暨遠往古來今既具此義理聖人編詩次序如此便可作是解免讀者若泥殺卽失之

聖人重次由庚崇卽由儀三笙詩見樂益盛意而禮益治可知

蓼蕭湛露二篇詩意亦相類。蓼蕭首章曰：既見君子，我心寫兮。燕笑語兮。是以有譽處兮。曰：既見，蓋言其初燕時如此。湛露首章曰：厭厭夜飲，不醉無歸。又言燕將終之意。此二篇先後之義也。

首鹿鳴篇曰：人之好我，示我周行。又曰：我有嘉賓，德音孔昭。視民不佻。君子是則是效。菁菁者莪。曰：既見君子，我心則喜。又曰：既見君子，錫我百朋。篇中皆見好賢之意。蓋王道以得人爲本。故二十二篇以此始之，以此終之。

車攻先言朝會諸侯而後及田獵。吉日惟言田獵之事。故吉日次車攻之後。又宣王中興之業。先外睦而後內寧。故陳修武復古之事。亦必先東都而後西畿。

沔水戒邦人諸友。鶴鳴納誨其君。故二篇之次如此。

黃鳥我行其野之意。如一篇。而我行其野末章。見詩人忠厚之志。所以次黃鳥歟。

作宮室之事。比牧事爲重。故無羊次斯干之後。

右小雅上

尹氏出王首亂之臣。故其詩亦居首。正月刺褒姒威宗。

周故次之。蓋外治得其人。雖寵嬖居內。而社稷可以倖存。此衛靈所以不亾也。尹氏之罪。甚於褒姒。夫子以節南山居正月前。垂戒之義也。若皇父諸人。又爲褒姒之黨。故十月之交又次之。

幽王時擅權大臣。既有尹氏。又有皇父。皇父雖宣王舊臣。見常武詩。然在幽王時。擅權爲惡。或尙不及尹氏耳。

小旻小宛小弁小明諸詩。皆謂之小。疑皆聖人編次二雅時所定。

小旻小宛以下。又推幽王亂亾之錄。其詩皆不以作之

先後而次也。

蓼莪哀父母之不得終養其事比谷風朋友相怨尤重大故蓼莪繼谷風之後。

大東四月以其地而次也。北山無將大車。小明以其詩意之淺深而次也。北山譏賦役不均。而自言其憂惟曰王事靡盬。憂我父母而已。無將大車曰。無思百憂。祇自底兮。無思百憂。不出於頤。無思百憂。祇自重兮。小明曰。心之憂矣。其毒大苦。念彼共人。涕零如雨。豈不懷歸。畏此罪罟。蓋其言以漸而益深切。故三篇之次如此。

大東四月外諸侯之人怨於內也北山無將大車小明內大夫怨於外也此內外交叛之勢也。

節南山以下十八篇刺幽王詩後繼以雅歌詩楚茨十篇初讀之似無義理可尋故小序毛鄭氏舊說謬作刺幽王詩而朱子疑其錯簡今由鼓鐘末章之言玩味之而得其義然後知聖人感慨之志寓於編次者微矣。

雅歌詩與刺幽王詩同次二者絕不相類然自大雅生民篇後卽附行葦至假樂四篇小雅首繼大雅末復冠以鹿鳴至菁菁者莪二十二篇此於鼓鐘篇後次以楚

茨至車牽十篇。魚藻采菽以下。其詩並相開爲次。義例本甚明白。次問諸解。不得謂之鑿說也。

大雅生民曰。后稷肇祀。庶無罪悔。以迄於今。故楚茨信南山甫田大田四篇。見后稷之遺。

周室以農事開基。王道之本也。前鹿鳴以下二十二篇。推衍王道。未及此義。故此復次以楚茨信南山諸詩。

楚茨與信南山同義。先楚茨。後信南山。先其詳而後其

略也。

楚茨敘祀事。比信南山爲詳。

甫田春祀方社田祖。大田秋祭四

方。先甫田。後大田。又以其時之先後而次也。

古者祀方社田祖。蓋亦有燕飲羣臣及受釐頒胙之樂歌歟。故甫田大田二篇。夫子錄之。與前後諸雅歌詩同次。

瞻洛下美其上。裳華上美其下。二篇之義若相答然。桑扈鴛鴦。又倒上二篇之義以反覆之。明上下交之道也。碩升車。車先兄弟後夫婦者。幽王之亂。起於夫婦。故以其詩終焉。

魚藻下美其上。采芣上美其下。先魚藻者。取其與寘之初筵之義相反對耳。

幽王內外無親。諸侯離叛。以致亂亡之禍。先以角弓內無親也。次以苑柳外離叛也。次以都人士采綠則傷亂之詩也。

都人士采綠二篇相次。一則懷盛。一則刺衰。反正之義也。

黍苗篇反對下白華篇義。以著申侯之罪。春秋之微旨也。

隰桑曰。既見君子。其樂如何。又曰。既見君子。德音孔膠。又曰。中心藏之。何日忘之。其誠心好賢如此。與前鹿鳴

菁菁者莪同意。

白華繼前都人士采綠之意。著幽王亡國之本。此義最分明。

小雅著幽王之亂。始於節南山。終於綿蠻。節南山刺用尹氏也。綿蠻刺棄賢也。其間次雅歌詩以寓意。前則始以鹿鳴終以菁莪。末則卒於陽柔。瓠葉二篇。皆一意也。綿蠻曰。道之云遠。我勞如何。飲之食之。教之誨之。命彼後車。謂之載之。瓠葉曰。幡幡瓠葉。采之亨之。君子有酒。酌言嘗之。又曰。有兔斯首。炮之燔之。君子有酒。酌言獻

之一則微賤勞苦而歎飲食教誨之靡從。一則誠心好賢而憂薄物酬實之不足反比之義也。

漸漸之石以下三篇詩意亦漸次而深皆亡國之作也。故居小雅之末。

右小雅下

大雅詩有祇美一人者有兼美數人者其詩皆相因而次。所謂以文王爲本而上下推之者。

概樸早麓皆美文王作人之化故其詩同次思齊末亦美作人。而其述文王之德尤詳。故又次其後蓋文王作

人之化必本於德如此也。

棧樸美天下之歸文王。早麓美文王之獲福祿。一篇之義若相承然。

皇矣以下。與首大明絲著重複之義。

大雅詩首文王大明絲。其詩之次以逆。

由文王上推皇
大王王季。

矣以下及下武文王有聲。其詩之次又用順。由大王王
季下逮文
武。

生民在大明絲皇矣下武諸詩之後逆而次也。公劉在
生民之後則又順而次也。

行葦既醉鳧鷖假樂四篇想見周室盛時氣象。

行葦上美其下。既醉下美其上。二篇之義亦如相答然。鳧鷖假樂之義亦相答。鳧鷖後行葦者。燕尸尊於燕宗族故也。凡詩有先尊而後卑者。又有由卑以及尊者。亦其順逆之次異也。

周道之興。基始后稷。然不啻以下。當中衰矣。迨公劉遷幽之後。周室于是寔盛焉。所以繼后稷開王業也。故大雅逆推祖德之詩。終以生民而繼以公劉。

右大雅上

民勞之辭猶婉。故先於板。

衛武公抑篇之作。其刺厲王之辭猶略。而桑柔爲詳。故抑篇在前。桑柔次之。

崧高。烝民。內大臣出封及使事於外者。韓奕。外諸侯來朝於內者。故崧高烝民韓奕三篇之大如此。仲山甫以冢宰兼大保。其位尊矣。然申伯乃宣王元舅。尊而且親。故崧高又在烝民之前。

江漢命召穆公平淮夷。常武伐徐。宣王自將。先江漢後常武。由卑以及尊也。

二雅錄幽王詩凡三十一篇。惟節南山以下三篇之義詳而盡。瞻卬召旻之義則簡而賅。故夫子一以冠幽王詩之首。一進之以終大雅。

瞻卬刺幽王之辭。比召旻爲深切。然召旻末章有亂極思治之意。故夫子以繫大雅之末。

右大雅下

孔子編次頌詩有二。其一廟祭之詩。其一祀典之詩。凡祀典詩各以其制作之意爲序。而以廟祭詩次其閒。又與次風雅之義不同。

清廟維天之命二篇。竝美文王之德。然清廟曰於穆清廟。肅雝顯相云云。言宗廟祭祀之事爲詳。故以清廟居首。而維天之命次之。

維清曰維清緝熙。文王之典。典與章法度也。蓋祀典亦在其中。故聖人取之以冠周頌。爲諸祀典詩之首。

我將宗祀明堂。是內祀時邁。巡守告祭柴望。是外祀。此

內祀外祀。謂在天子之國。與在侯國境內者。下文同。故先我將次時邁。其因明堂之義類次之。又是編次內意外之意。

郊者古禮。明堂者周制。周公之創典也。故其詩先我將

後思文

明堂宗祀。巡守柴望。郊配后稷。皆祀典之大者。故竝列祀典詩之首。先我將。後時邁。由內祀及外祀也。先時邁。後思文。由外祀及內祀也。

巡守柴望。亦是古禮。然時邁爲武王初克商有天下時詩。故先思文。此不惟取內外祀相聞之義。以上數條與次問互相發明讀者詳之。

周頌前不次祭武王之詩。言無專祭武王廟之詩耳。然天有成命篇。兼美文武。執競首美武王。時邁又稱武

王初克商有天下之事其所以著武王之功者備矣

臣工噫嘻二篇之義若相承然故其次如此

有瞽次豐年潛之閒其詩亦是相閒而次

離載見皆率諸侯助祭於廟之詩但離祭文王廟載見祭武王廟故其詩先離後載見

頌列成王祭武王廟之詩三載見閔予小子訪落是也然離載見並首言諸侯助祭之事則與烈文之義例爲一故列祀典而不列廟祭

閔予小子成王初卽位朝廟之詩未及訪羣臣也故訪

落敬之次之。然閔予小子曰。閔予小子。遭家不造。蜚蜚在疚。始免喪之辭也。訪落曰。維予小子。未堪家多難。則已爲三監叛時語矣。小苾曰。予其懲而毖後患。則又三監旣平後懲已往戒將來之意。故四篇之序如此。

訪落訪羣臣之道。在率昭考。敬之在敬天命。率武王。卽所以敬天命也。訪落未歸於自責。而敬之未歸於責羣臣。二篇之序有先後。亦見言有次第。

周自昭王以降。如宣王中興之主。論其功德。亦宜有頌。豈先嘗作而後匹之歟。抑爲其始勤終怠。而孔子削之。

歌。

右周頌

魯頌四篇次序。或史克當日已如此。或孔子時所更定。其說今無可考。闕之可也。

聖美僖公有駟兼美其臣。故二篇之次有先後。

閔宮美魯之先德。及僖公之功。比泮水爲詳。故先泮水。後閔宮。以詩意之淺深而次也。

右魯頌

商頌首那。始自正考甫。然其時存者則十二篇也。至孔

子時僅存五篇則十二篇與五篇不同五篇之大斷自
孔子何疑。

那烈祖皆祀成湯之詩然商頌以那爲首由來舊矣故
夫子因之所以存正考父之遺也。

玄鳥長發竝美商之世德先玄鳥後長發者亦以詩意
之淺深而次也。

商頌五篇不以世次爲序故玄鳥祀武丁孫子之詩先
於殷武。

右商頌

詩益卷之十一終